

U skladu sa odredbama članova 13. i 33. stav 1. tačka j) Zakona o osnivanju Nezavisnog operatora sistema za prenosni sistem u Bosni i Hercegovini ("Službeni glasnik BiH", broj: 35/04), člana 25. Statuta Nezavisnog operatora sistema u Bosni i Hercegovini ("Službeni glasnik BiH" broj: 89/16 i 84/18), te članova 10. i 13. Pravilnika o priključku ("Službeni glasnik BiH" broj: 95/08, 79/10, 60/12 i 83/17), generalni direktor Nezavisnog operatora sistema u Bosni i Hercegovini dana 14.03.2024., donosi:

PRAVILNIK
o radu Komisije za reviziju
Elaborata tehničkog rješenja priključka korisnika na prenosnu mrežu

Član 1.
(Predmet pravilnika)

- (1) Ovim pravilnikom propisuje se način rada Komisije za reviziju Elaborata tehničkog rješenja priključka korisnika na prenosnu mrežu (u daljem tekstu: Komisija).
- (2) Komisija će posao revizije Elaborata tehničkog rješenja priključka korisnika na prenosnu mrežu (u daljem tekstu: Elaborat) obavljati u skladu sa Pravilnikom o priključku i ovim pravilnikom.

Član 2.
(Imenovanje članova Komisije)

- (1) Ukoliko Elaborat izrađuje druga stručna institucija uz prethodno odobrenje Elektroprenosa BiH i Nezavisnog operatora sistema u Bosni i Hercegovini (u daljem tekstu: NOSBiH), generalni direktor NOSBiH-a rješenjem imenuje članove Komisije koja se sastoji od predstavnika Elektroprenosa BiH (dva izvjestioca) i predstavnika NOSBiH-a i to: predsjednika, dva izvjestioca i sekretara. U slučajevima kada revizija Elaborata zahtjeva povećani obim rada Komisije, ista može biti proširena za najmanje još jednog člana.
- (2) Ukoliko Elaborat izrađuje Elektroprenos BiH, generalni direktor NOSBiH-a rješenjem imenuje najmanje dva izvjestioca, predsjednika i sekretara (članovi Komisije) iz NOSBiH-a. Reviziji Elaborata obavezno prisustvuju i predstavnici Elektroprenosa BiH u svojstvu obrađivača.
- (3) Reviziji Elaborata obavezno prisustvuju predstavnici korisnika i obrađivača.

Član 3.
(Organizacija rada Komisije)

Revizijom Elaborata rukovodi predsjednik Komisije. Izvjestioci su obavezni da najmanje 7 dana prije zakazanog termina revizije dostave sekretaru Komisije svoje izvještaje u elektronskoj formi. U izuzetnom slučaju, uz prethodno informisanje i saglasnost obrađivača, ovaj rok može biti kraći od 7 dana.

Član 4.
(Odluke Komisije)

- (1) Odluke Komisije donose se u formi zaključaka. Svi članovi Komisije su ravnopravni u predlaganju zaključaka. Zaključci se donose prostom većinom glasova prisutnih članova Komisije.
- (2) Ukoliko se neki član Komisije ne slaže sa zaključcima, može pismeno, uz odgovarajuće obrazloženje, izdvojiti svoje stručno mišljenje.

Član 5.
(Izrada i dostavljanje zaključaka)

Zaključke izrađuje sekretar Komisije u pisanoj formi, uz prethodno usaglašavanje sa članovima Komisije i iste dostavlja svim članovima Komisije, korisniku i obrađivaču.

Član 6.
(Naknada za rad Komisije)

- (1) Naknade i ostale troškove članovima Komisije isplaćuje korisnik.
- (2) Troškovi rada Komisije su u korelaciji sa instalisanom snagom korisnika, odnosno uticajem njegovog objekta koji priključuje na prenosnu mrežu ili za postojeće objekte u slučaju povećanja instalisane snage, dogradnje ili rekonstrukcije objekta.
- (3) Neto naknada za učešće u reviziji Elaborata za svakog člana Komisije određuje se prema sljedećoj formuli:

$$C = \sqrt[3]{P_{inst}} \cdot 400 \cdot k$$

gdje je:

C- naknada

P_{inst} - instalisana snaga priključka

k- koeficijent porasta troškova u odnosu na baznu godinu 2014., kada je

k=1.

- (4) Naknada za rad predsjednika Komisije množi se sa koeficijentom 1,4, za izvjestioca sa 1,2, a za člana i sekretara sa 0,7 naknade.
- (5) Ukoliko se revizija Elaborata održava van sjedišta NOSBiH-a, neto naknada za članove Komisije se uvećava za pripadajuće dnevnice, putne troškove, troškove noćenja i ostale troškove, u skladu sa važećim propisima Bosne i Hercegovine.
- (6) Ukupne troškove revizije Elaborata, korisnik je dužan izmiriti zaključno do roka za podnošenje izvještaja o reviziji članova Komisije.

- (7) Naknade i ostale troškove članovima Komisije korisnik može isplatiti putem NOSBiH-a ili direktno članovima Komisije.
- (8) Ukoliko naknade i ostale troškove članovima Komisije korisnik isplaćuje putem NOSBiH-a, NOSBiH ispostavlja fakturu korisniku u visini naknada i troškova članova Komisije uvećane za troškove pripadajućih poreza, doprinosa i ostalih obaveza. Osim toga, naknada se uvećava i za obaveze koje se isplaćuju iz neto naknade člana Komisije. Naknade i ostale troškove članovima Komisije NOSBiH isplaćuje nakon naplate fakture od strane korisnika.
- (9) Ukoliko naknade i ostale troškove članovima Komisije korisnik isplaćuje direktno, visina naknada i troškova članova Komisije se uvećava za troškove pripadajućih poreza i doprinosa na neto naknadu, kao i obaveza koje se plaćaju iz neto naknade.
- (10) Eventualni troškovi najma sale i ostali prateći troškovi padaju na teret korisnika.

Član 7.

(Izdavanje potvrde o završenoj reviziji)

- (1) Revizija Elaborata provodi se po načelu prvenstva. U slučaju istovremene revizije dva ili više Elaborata, prednost pri izradi revizije ima onaj korisnik koji je ranije dostavio Elaborat na reviziju, po načelu „prvi u vremenu, jači u pravu“, pod uslovom da Komisija, većinom glasova, ocijeni da je Elaborat ispunio uslove definisane Projektnim zadatkom.
- (2) Ukoliko Komisija ocijeni da Elaborat nije ispunio uslove definisane Projektnim zadatkom, Elaborat se vraća na ponovnu izradu i gubi svoje mjesto u redoslijedu revizija.
- (3) Potvrda o završenoj reviziji za određeni Elaborat se ne izdaje sve dok se ne završi revizija svih Elaborata koji su dostavljeni na reviziju prije tog Elaborata, a za koje je prethodno utvrđeno da ispunjavaju uslove definisane Projektnim zadatkom.
- (4) Ukoliko se članovi Komisije izjasne da Elaborat ispunjava sve zahtjeve propisane Projektnim zadatkom, NOSBiH korisniku izdaje Potvrdu o završenoj reviziji Elaborata.
- (5) Potvrda o završenoj reviziji Elaborata dostavlja se i Elektroprenosu BiH, čime se potvrđuje da su se stekli uslovi za izdavanje Uslova za priključak korisnika.
- (6) Izuzetno od stava (3), ukoliko Komisija utvrdi da korisnik čiji je Elaborat dostavljen na reviziju nakon određenog/ih Elaborata, nema uticaja na rezultate Elaborata koji su u reviziji prije njega i obrnuto, može usvojiti Elaborat i dati u dalju proceduru izdavanja Potvrde o završenoj reviziji Elaborata.

Član 8.
(Prestanak važenja)

Stupanjem na snagu ovog pravilnika prestaje važenje Pravilnika o radu revizione komisije za ocjenu elaborata o priključku Nezavisnog operatora sistema u Bosni i Hercegovini broj: 02-270-1/23 od dana 14.02.2023. godine.

Član 9.
(Stupanje na snagu)

Ovaj pravilnik stupa na snagu danom donošenja, te se objavljuje na internet stranici NOSBiH.

Broj: 02-449-1/24
Sarajevo, 14.03.24. godine

Generalni direktor
dr. Nemanja Pandurević

